

四庫全書

集部

欽定四庫全書

集部

宗忠簡集

御製文

卷一

詳校官庶吉士臣陳若霖

侍讀臣孫球覆勘

覆校官中書臣田尹衡

校對官中書臣吳俊

謄錄監生臣董邦本

御製讀宗澤忠簡集

偶閱宗澤忠簡集愛其乞回鑾諸疏不忍釋手既終卷
乃知章凡二十四上而高宗漠然也夫南渡去今乃六
百餘年讀其疏者未嘗不嘉其血誠賞其卓識歎其孤
忠欲為墮淚而彼時為之君者聽宵小深入之言懷優
游苟安之計屏之而弗顧是尚得為有人心哉以致捐
中原棄赤子謀曰我終能延趙氏一脉於餘杭嗚呼人
而至此是誠不知有五倫之事而天良喪盡者矣雖汪

黃謬論有以懾之使高宗無偏安之心有必為之志亦
焉能動聽則後之秦檜倡和議而稱一德亦必有以早
窺其心曲也或曰宗澤之心雖誠以彼時南北之勢較
之金源之釁其真可乘河北之民之心其真可信乎則
興復之舉固未易言也曰然復讐其要也興復其次也
不共戴天不反兵高宗於此蓋兩兼之矣徒跣以從不
顧一己之成敗利鈍可也而居臨安翫湖山稱姪於讐
以徒得歸葬之骸骨是誠何人哉嘗謂人君者

天之子也俗云子雖不肖父不可不慈予則謂

天之於天之子子雖不肖

天不忍不慈遠固不可枚舉近則於宋元明見之矣元
得統甫八十年立國之謨無足比數若宋南渡以後有明
正嘉以旋其綱紀陵夷政事叢脞早應滅亡而不即亡
者豈非

天父有不忍不慈之心而尚為之苟延其世以待其悛
改乎然此不可恃也大君者父母之宗子而黎元者均

之一家内之人也今持家者苟不顧一家之人使之顛
連而無告則其父母未有不怒怒而教教而不改其父
母亦必有以處之矣為君者之於民亦猶是也嗚呼可
不慎哉可不懼哉

欽定四庫全書

集部四

宗忠簡集

別集類三宋

提要

臣

等謹案宗忠簡集八卷宋宗澤撰澤事蹟

具宋史本傳是編自一卷至六卷皆劄子狀
疏詩文襍體七卷八卷為遺事附錄皆後人
紀澤事實及誥勅銘記之類也澤孤忠耿耿
精貫三光其奏劄規畫時勢詳明懇切當時

狃於和議不用其言亦竟無收拾其文者至
寧宗嘉定間四明樓昉乃綴輯散佚以成是
集然陳振孫書錄解題竟不著錄是宋末已
不甚行蓋理宗以後天下趨朝廷風旨道學
日興談心性者謂之真儒講事功者謂之襍
霸人情所競在彼而不在此其沉晦不彰固
其所也明崇禎間熊人霖始據舊本重刊
國朝義烏縣知縣王庭曾又重為編定增入諫

止割地一疏而以樓昉原序及明初方孝孺
序弁於篇首考史稱澤力請高宗還汴疏凡
二十餘上本傳不盡錄其文今集中所載僅
十八篇猶佚其十則其散亡已多矣乾隆四
十二年九月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

宗忠簡集原序

靖康丁未高宗再使幹里雅布軍時敵情叵測中外危栗
宗忠簡公守磁則決策留行於是適濟適鄆適大名適
睢陽遂登大寶中興之業實始基焉宗公力也公之初
意欲正位號係天下心因以羽檄天下兵濟師河朔旋
軫舊京其迂回宿留東南其轍者乃汪黃謬計非公本
謀也公既與汪黃異議不復預聞幕府事高宗藉其壯
謀既留命居旋升尹正駕御羣雄招降劇盜兵強士勇

法立誅必敵連歲不敢犯境於是清宮除道謀還二聖
奉迎大駕汪黃益忌之凡公奏請皆留中不下自傷不
得展布疽發背以死公之勲業雖不克竟而英寬毅鬼
皦然與日月爭光可也昉兒時固已得公芳規於四明
所刊遺事中真所謂膽大於軀者意其語言文字當亦
稱是客授金華始獲拜公像公之曾孫有德出示遺文
若干種因為補綴而襲藏之適守南徐公松楸在焉曾
部使者喬行簡攝郡事築僧廬於墓左剏祠堂於學宮

總餉岳公珂太守趙公善相繼命有德主丞嘗所以風厲扶植之意甚厚郡博士方君符尤所鄉慕請以有德所授遺文鋟梓昉遂掇取遺事中所載表疏次第其日月而併刻之公前後奏請為回鑾而發者凡二十有四其血誠赤心因可想見它文雖單言半字無非從忠義中流出公亡而杜充代帥王業偏安蓋始於此公之規模志節罕有能道之者況其遺文乎若諸公表揚忠烈例應得書嘉定辛巳十有二月鄞人樓昉拜手書

國之廢興存亡蓋天也而有人事焉由其已然之跡而觀之人謀之從違事變之得失皆如預定而不可易者人力若奚所用自其未成之始而論之成敗禍福之機待人而發豈皆出于天命哉故善為天下者盡人事以回天道不善者委天命以怠人事田單齊之壯士用一邑瘡殘之民復七十餘城不數月之間諸葛孔明以王者之佐驅全蜀之衆欲取中原之尺寸終其身而不能遂非特天命也人事之難易固不同也率赤子以救父

兄疾呼而可集說途之人使拯其鄰于難雖善其辭令有所不從賢者能勉人以其所樂為不能強人以其所難勉單之用齊人人皆有亡國喪家之憤而自為戰故其成功也易孔明之時人知有曹氏不知漢德久矣孔明徒欲以忠義激之安能必其從已乎宋敗于金而不復中興人以為天命而不知人事失其機故也張浚趙鼎可謂天下之賢相而韓世忠岳飛劉錡之徒亦一時之將材高宗雖庸懦豈遽出法章下哉然而沮撓而不

足成事者以其初不用宗忠簡公之言耳徽欽之亡在乎兵不足戰而忠簡公既入都城百萬之兵立具爭欲為之致死忠簡之賢固足以得衆而斯民戴宋之心亦安可誣哉當是時也正田單復齊之機而忠簡公孔明之流亞也使高宗能用其策公少延歲月未死則覆沒之地可以迅掃而平敵人可以縛而獻諸太廟豈有蹙國事讐之辱哉失此不聽至于竄伏東南而欲圖之則民心之忘宋亦已遠矣是以終不能有所成非特秦檜

湯思退之罪也人無勇怯惟其所用乘其方銳而用之
中人皆可為壯夫及其氣衰志懾雖烏獲亦投劍而却
顧公之拳拳欲高宗都汴者欲用天下之銳氣以復讐
雪耻而高宗信小人畏避之謀棄不復聽而公亦死矣
斯豈天命使然耶實人為之不盡也公沒今三百餘年
而請高宗還汴之疏二十有四不盡載于史氏其九世
諸孫濬錄藏于家而屬余序之公忠義著于後世不待
疏而後見疏之所著不待言而後明然世皆知宋之不

復振由于秦檜之相而不知始于不用公之言余是以
具論之使知此疏之不從實宋室之所由分也方孝孺
誤

欽定四庫全書

宗忠簡集卷一

宋 宗澤 撰

劄子

上大元帥康王劄子

某恭惟太祖皇帝創業垂統當傳之億萬世今方二百年宣謂仇方橫肆邀迎二聖與諸親王渡河北去天下百姓所注目繫其望者惟大元帥康王一人大元帥行之得其道則天下將自安宗廟社稷將自寧二帝二

后諸王將自回彼之仇方將自剿絕殄滅大元帥行之
不得其道則天下從此而亂宗廟社稷亦從此而傾危
二帝二后諸親王無夤緣可回仇方愈熾亦無因緣而
亡此事在大元帥行之得其道與不得其道耳某所謂
道者其說有五一日近剛正而遠柔邪二曰納諫諍而
拒諛佞三曰尚恭儉而抑驕奢四曰體憂勤而忘逸樂
五曰進公實而退私偽是五者甚易知易行然歷世莫
能知能行者繇剛正諫諍恭儉憂勤公實之事多逆於

心也柔邪諛佞驕奢逸樂私偽之事多遜於志也伊尹
曰有言逆于汝心必求諸道有言遜於汝志必求諸非
道合諸道者君子也合諸非道者小人也願大王於應
酬答問之間以茲五事卜驗則君子小人了然分矣某
之血誠痛切每思我宋本嗣無疆今勢孤危岌業如此
某願大元帥大王左右嘗膽不忘在濟時夙夜羹牆不
忘我祖宗時則天下可安宗廟社稷可寧二帝二后諸
王可回仇方雖熾可剿絕殄滅夫何遠之有在大元帥

大王力行之而已

條畫四事劄子

臣聞情生於愛愛生於見見生於目之所遇與左右之所接所遇所接果順於已則喜喜則賞之賞之者非懋其功也賞其順已而已耳所遇所接果逆於已則怒怒則罰之罰之者非罰其罪也罰其逆已而已耳如是則賞罰出於喜怒喜怒出於逆順可謂之公而無私乎賞罰徇私其何以礪世磨鈍大有為於天下乎聖人無我

故忘情忘情故忘逆順忘逆順故忘喜怒故賞一善而天下之為善者勸知其非私善也罰一惡而天下之為惡者沮亦知其非私惡也一賞一罰歸之至公而我無容心焉人其不心悅而誠服者乎陛下所以號令天下使人知所趨知所避知所行知所止者賞罰而已昔文王一怒而安天下之民武王亦一怒而安天下之民是怒也豈發於目之所遇與左右之所接哉彼仇方橫肆兇暴侵犯我王室臣願陛下如文王武王亦一怒而安

天下之民有賞有罰惟平惟一至于應酬萬機進退取予之際斷之至公以慰天下之望

臣聞人君職在論相昔舜有天下選於衆舉皋陶不仁者遠湯有天下選于衆舉伊尹不仁者遠皋陶贊舜去四凶而後九德咸事庶績其凝伊尹贊湯革夏而後咸有一德格于皇天是知不仁者遠不能播其惡于衆始能使衆賢和於朝更相汲引以成大功也以人君身居九重其彌縫變理鎮撫表正但仰成于朝而已高宗得

傳說而高中興憲宗得裴度而唐中興臣願陛下于稠
人廣衆中不以親疎不以遠近不以夢不以卜虛心考
驗叅以國人左右之言爰立作相俾之應變守文果得
其人能率厲衆志交修不逮其在位皆節儉正直小大
之臣咸懷忠良以持天下之正以成天下之務天下其
有不大大治者乎陛下果尊道德遠邪佞與大臣言欽而
信毋使小人叅焉與賢者遊親而禮毋使不肖者與焉
用賢勿貳去邪弗疑斯言行而天下治矣書曰知之非

艱行之惟艱知之不行無益也行之不至無益也茲事在陛下力行之而已矣

臣伏聞李絳見憲宗于浴堂殿帝曰比諫官多朋黨論奏不實皆陷謗訕欲摘其尤者如何絳曰此非上意必憊人以此熒誤上心自古納諫昌拒諫亡夫臣進言于上豈易哉君尊如天臣卑如地加以雷霆之威彼晝夜思度如欲陳十事俄而去五六及將以聞則又憚而削其半故上達者纔十二何哉干不測之禍顧身無利雖

開納獎勵尚恐不至若譴訶之使杜口非社稷利帝曰
非卿之言我不知諫之益且人君深居嚴密又以疏纘
蔽其聰明所以見天下之是非開天下之情偽者盖用
諫官代為耳目俾姦邪讒慝不敢掩其不善而見其善
者也唐高祖太宗初即位嘗賞孫伏伽蘇世長以激諫
臣恭惟陛下聲色貨利弗邇弗殖舍已從人樂取諸人
以為善固無可諫者至於臣下懷姦藏慝嫉賢蔽善敢
肆欺罔苟朋比者當使耳目之臣廣其聞見瀝心殫糾

毋有所隱以絕後艱

臣聞天下之事為於可為之時則成為於不可為之時則敗成敗之機間不容穢是以古人有時哉不可失之語恭惟陛下繼離之照法乾之剛故見幾而作炳果斷而罔後艱成敗之幾不出昭回之鑒臣復何言臣誠心祇思徇國久荷眷遇臣非木石能不自知然臣每見事有當行請之必力言既拙直勢甚孤危願陛下察臣之衷力賜保祐使全骸骨以盡餘年臣之惓誠言不盡意

奏乞過河措置事宜劄子

臣契勘河北西路真定懷衛濬等處見有敵人占據今又分留敵馬於洺州四向剗寨密栽鹿角意欲攻打若河西諸州不守即彼之姦計包藏不淺京師雖為備禦未易可居臣為見有上件事宜已於今月初七統押人馬自游家渡過河會約河西忠義統制等商議隨宜措置若事理可行即一面招集同心協力以圖收復安集流移為久遠利若敵勢厚重不可施行即具所見利害

的確便宜畫一敷奏伏望聖慈體念河北繫天下根本河北不守則干戈矢豈易橐戢臣每思前日之失蓋繇將相恃賴太平恬不為恤朝進一言暮入一說惟以講和乞盟為意今更浚襲不習武備臣竊憂之兵法曰先為不可勝以待敵之可勝臣不揆衰繭無能見過河相度別具奏聞者

狀

大元帥府勸進第二狀

某等累狀乞大王早決大計以安人心伏惟降到劄子
所請難議施行者屢布忱誠仰祈洞鑒茲叶衆區之願
實繫宗廟之依豈謂隆謙未蒙昭允竊以四海之遠必
發號施令然後上下孚必信賞必罰然後小大服深惟
軍國之重可虛宸極之尊二聖播遷羣黎翹佇念祖宗
積累垂無疆燾養之恩而仇方貪殘起不測侵陵之變
有疎早悟遂致稔姦雲甲霜戈共力追於朔野天旌龍
馭期早復於皇居然推戴有繫於人心況寄託已彰於

天意尚稽獨斷曷慰輿情伏望大王以聰明之資振久
大光明之業以智勇之略弭變亂窺竊之風鞏固洪圖
措安大器不得已臨蒞赫乎羣目之瞻惟式克欽承亶
乃萬方之聽某等無任祈求懇切俟命之至

乞大元帥於南京開府狀

契勘張邦昌久在敵中范瓊亦自草野中起恐其包藏
陰與敵結凡事未可容易憑信某十日前因與汪闕
咨目乞密稟大王且於南京開府想旬浹間便可如意

一京城是祖宗應天受命長發之地二道路居中四方
萬里便於申稟三臨下流諸處漕運尤易辦集四於拱
寧屯兵為嚴守計五可斷北來餉道敵雖稔姦當自破
滅却令某統領見所管諸處節制人馬盡數前去京城
十里以來劄寨齋大元帥榜文敘哀痛懇切未忍遽歸
瞻望宗廟朝廷與省府舊官閭巷父老相見哽噎眷眷
之意觀人心徯佇懇切然後按轡徐行庶為萬全不至
落敵姦便某下情不勝瞻慕之至切望哀亮血誠早賜

施行

信王咨目

某咨目頓首上呈領尹元帥延康台座春和伏惟輔國
宣勞神相忠勤台候多福某切以國家多艱金人入寇
兩犯京城劫遷二聖下及血屬三千餘口長驅北去某
到慶源遽謀逃竄得敵中忠義數人為力遂脫羶網今
具河北事宜利害敷奏聖上竊恐姦臣賊子障蔽難達
某素知公梗槩敢為竭節報國遂再具奏煩公多方繳

奏使之得到御前得兵速至不勝萬幸自餘更冀上為
廟朝倍保台重前膺大拜祝望之至不宣

疏

奏乞依舊拘留敵使疏

建炎元年六月

臣伏見我國家承平幾二百年數世戴白之老不識兵
革上下恬嬉猶夷度日不復以權謀戰爭為念乃以仇
方誕謾為可憑信朝廷恬視不少置疑不惟不曾教人
坐作進退擊刺挽射之技俾嚴攻討其間有實欲賈勇

思敵所愾之人士大夫不以為狂則以為妄因循苟且以致仇方顛越不恭遂有前日之禍臣不勝憤恨然茲非仇方之能也皆繇無誠實之士鼓倡驕逸率以斂跡逃避曲辱不恥為智為勇耳萬一有慷慨論列則掩耳不聽別造佞說以相浮動茲無他大抵只欲助敵張皇聲勢直為我祖宗一統基業更不當顧藉宜兩手分付與仇方耳嗟乎何不忠不義之甚也臣每思念涕泗交下繼之以血此天地神明之所昭鑒臣恭惟淵聖皇帝

靖康之初信此和議俾敵大獲而歸去冬與今春夏仇
方猖獗大臣柔邪諛佞蓄縮畏避者不敢略有抗拒語
但以詭譎為誠實包藏為智謀緘默為沉鷺遂致二聖
蒙塵后妃與親王無辜之民流離北去想陛下龍潛濟
鄆嘗親聞見張邦昌耿南仲輩所為也陛下入繼大統
即將前主和議者竄之嶺外使天下冤抑之氣一旦舒
快自後臣竊聞陛下日與二三大臣論思講畫必欲大
雪我廟朝之恥激厲卒伍勸率義士俾思剿絕以正夷

夏不意陛下復聽姦邪之語又浸漸望和迂回曲折為
退走計臣願陛下試一思之陛下初即位何故以講和
為非遂當世議臣陛下近日又何故只信憑姦邪與
仇方為地者之畫營繕金陵迎奉元祐太后仍遣省官
迎太廟木主棄河東河西北京東京西淮南陝右七
路千百萬生靈如糞壤草芥略不顧恤比仇方遣姦狡
小醜假作使偽楚為名來覘我大宋虛實臣見如是因
納諫狀與留守范訥乞收仇方奉使之入置之牢檻奏

取朝廷指揮庶激軍民士庶懷寃之心俾肯力戰仰贊
陛下再造王室中興大宋基業之意今却令遷置別館
優加特遇臣奉此詔命憂思涕泣心欲折死不知二三
大臣何為於仇方情欸如是之厚而於我國家訐謨如
是之薄臣每思京師人情物價漸如我祖宗時若鑾駕
一歸則再造之功與中興之烈必赫奕宏大跨商周而
越漢唐矣何姦邪之臣尚狃和議惶惑聖聰伏望陛下
察之臣之樸愚不敢奉詔以彰國弱此我大宋興衰治

亂之機也臣願陛下思之陛下果以臣言為狂願盡賜
褫削投之瘴烟遠惡之地以快姦邪賊臣之心不勝痛
憤激切之至

條畫五事疏

臣衰老孱愚誤膺簡記但思瀝竭知無不為凡所敷奏
仰干天聽過蒙採納委曲俞允臣非木石豈不知感但
有經從三省與樞密院事百端阻抑幾不可行臣欲隱
忍不言首鼠承稟切慮事干國體臣雖萬死奈宗廟朝

廷天下根本與數百萬生靈何臣所管留鑰與畿甸事
所繫實大願陛下憐憫孤忠毋以近言惶惑聖聰臣且
以近日三省樞密院戒約之文臣有五疑焉器甲械用
衲襖襖衫兵幕之類皆椿管準備不得擅有支遣今遣
將出師此是軍中合用之物不可闕誤而先行椿管不
容支遣此一可疑也臣近召募人於四城劄寨為守禦
之備今承問所召募之人係是何等色額如此則古人
使貪使愚者皆不可憑信矣二可疑也臣為見尋常防

河只以數千卒伍沿河分布敵有數騎侵犯即奔走潰散不復支吾臣今合京畿十六縣內有兩縣瀕河共七十二里均之諸縣縣管四里有畸各令開河闊一丈八尺於南岸埋鹿角連珠劄寨敵有侵犯併力禦之已蒙聖慈矜允行之亦似允當今樞密院行下約束只令依倣陝西以三七分為率三分出戰七分出助軍錢陛下念畿縣居民例遭殘破平時保甲十七五六若止用此其寔無幾沉重遭傷殘之餘勞來安集之猶恐散去又

烏可以助軍錢阨之使速去耶此三可疑也今歲守禦之具與城池之備雖已粗辦尚多鹵莽未能如舊去處必須曉夕修造補葺繕備今三省樞密院指揮諸場庫務如修城造器械見催工役不令支錢今修城雜場與軍器監入作司皆縮手無所為此四可疑也夫人之情無大小無貧富靡不懷鄉土顧妻孥戀墳墓舉千萬人貌雖不同情即皆一歷世聖王所以成天下之大順而得多助之至天下順之者以能順人之情而已矣臣伏

想陛下貌貅扈從億萬之衆多西北人陛下無偏聽三
四重臣之言試廣詢僉同叶從之輿論斷自淵衷以決
行幸臣竊見僕射黃潛善樞密汪伯彥張慤皆無遠識
見無公議論偏頗回遘惟富貴是念朝入一言暮入一
說皆欲贊陛下南幸此五可疑也伏望聖慈察臣之忠
聽臣之言早賜睿旨

再奏乞修寶籙宮疏

臣昨奏乞修寶籙宮為淵聖皇帝他日涖止之所未蒙

降旨臣聞有子曰孝弟也者其為仁之本與知孝弟則
不犯上不犯上則天下治矣恭惟陛下孝於道君則天
下莫不愛其親陛下弟於淵聖則天下莫不欽其兄是
知上有所好則下必有甚焉者矣此所謂以身教者也
臣竊見隆德宮面勢翬飛孔安如舊將來迎奉道君皇
帝自可臨御願陛下預勅有司洒掃嚴潔使天下知陛
下孝於父淵聖將來還歸未有蒞止之處臣欲乞修寶
籙宮改建以為迎奉之地使天下知陛下弟於兄也推

而行之薄海內外父父子子兄弟弟黎民不時雍而
萬國不咸寧者未之有也如蒙俞允伏望斷自淵衷御
前處分行下付臣施行

乞都長安疏

聖宋都汴城垂二百年天下未嘗有犬吠之警靖康初
年金人兩犯京闕兵將失守遂致二聖播遷臣子言之
可為痛哭陛下繼承大統即位南京顧非不知宗廟社
稷之所在而都人士庶之望幸也時金人退師之初大

姦擅國之後或慮舊染未浹包藏不測固將有所待也臣
區區愚衷每輒過計切以京師者諸夏之本根素號四
通八達之郊舟車輻輳民物浩穰方天下無事而居之
實為萬世之長利也今仇方猖獗動至畿甸恐議者慮
今秋長驅南來不過請陛下遷都而已洛陽既已殘破
大名稍近賊境必曰南都可矣若以其俯臨清汴緩急
之際可以順流而下轉至江淮虎踞龍蟠金陵可都大
不然也且並進而深入擣得金人巢穴以迎二聖陛下

駐蹕長安則金人必不能西向潼關中原豪傑盡樂為
陛下用內外之患皆可消弭而祖宗大業可以永保而
傳億萬世天下既定東還京師亦不晚矣臣狂愚言不
足採惟陛下留神而聽之天下幸甚取進止

奏給公據與契丹漢兒及被擄之民疏

建炎三年四月

臣契勘金人一族本大遼之臣曩緣羣臣姦謀苟以目
前之利相結壞亂耶律天祚使金人假大遼之衆侵犯
中國竊見契丹漢兒自與我宋盟約幾百年實唇齒兄

弟之邦偶被金人殺擄忿怨不已止緣勢弱未繇報寃
今若復約盟會使得回戈共力破敵一舉便可滅亡臣
以措置彫印文榜公據令生獲漢兒齎往傳報自相激
發設契丹漢兒未遽效命金人知之必相疑貳庶乘機
併力賊勢可分所有本朝被擄良民臣亦依此措置曉
諭今繳連文榜公據共三本在前者

乞回鑾疏

建炎元年知開封府通前
後來疏係第一次奏請

臣聞三代之得天下也得其民也得其民有道得其心

也得其心有道所欲與之聚之所惡勿施爾也是則得民之道在察其心之所欲與其心之所惡而已此古所以有天時不如地利地利不如人和之語求民之和豈必家至戶到一一而求之哉應天順人承天下之大順則民不期和而自和矣臣蒙恩差知開封府臣雖衰老無能然久知開封染習諸統制下皆是招集惡少亡命無行者臣既領府事更不敢徇身自顧但以正道歷誠感之不旬浹間彼惡少輩咸知格心燠謀斂迹遁去其

閭巷間亦自然悅改上下帖然無復肆橫以是人人鼓舞仰陛下之威懷陛下之惠拳拳慕戀不啻嬰孺之愛父母咸思發憤敵其所愾臣每聞王畿內外日久嘉靖熙熙皞皞將如向祖宗慶祐熙豐時臣觀人心念念俟望者惟願陛下六龍之御警蹕之聲千乘萬騎來歸九重以副萬邦切切繫戀之誠

再乞回鑾疏

建炎元年七月通前後表疏係第二次奏請

臣聞禹之行水行其所無事所謂無事者非泊然無所

為於事也事無事而已夫禹蒙天錫洪範九疇知水有
順下之性且親見堯有洪水滔天績用弗成之患遂因
水之性而順道之故天下免乎昏墊而奠厥攸居茲無
他皆堯用禹之功也臣竊聞將士籍籍皆願陛下歸京
師云京師是衆兵駐劄之本根也商旅籍籍皆願陛下
歸京師云京師是天下賈販之要區也農籍籍皆願
陛下歸京師云京師是天下首善之地也士大夫懷忠
義者籍籍皆願陛下歸京師云京師是陛下祖宗之域

也臣前在臨濮兵寨中寔憂羣臣無遠識見恐贊陛下
去維揚金陵又見京城有賊臣張邦昌僭竊與范瓊輩
擅行威福無所忌憚所以曾暫乞駐蹕南都以觀天意
以察人心仰蒙聽從臣誤被宸恩差知開封府事今到
五十餘日物價市肆漸同平時每觀天意眷顧清明每
察人心和平逸樂且商賈農民士大夫之懷忠義者咸
曰若陛下歸正九重是王室再造大宋中興也臣竊料
百僚中唱為異議不欲陛下歸京師者不過如張邦昌

等姦邪輩陰與賊虜為地耳臣願陛下體堯禹順水之
性順將士順商旅農民順士大夫之懷忠義者早降勅
命整頓六師及詔百執事示謁款宗廟垂拱九重之日
毋一向聽張邦昌姦邪輩陰與仇方為地者之語不勝
幸甚臣之少也猶不如人今年六十九矣脊脊血誠恨
其學問荒鄙不能以激忠義之辭仰動天聽不勝涕泣
痛怛之至

乞回鑾疏

建炎元年九月通前後
表疏係第四次奏請

臣聞聖人中天下而立定四海之民夫中原天下之中也京師又中原之中也我太祖太宗受天景命始基於汴肇造無疆膺大歷服固欲傳之億萬世偶去冬今春信憑仇方姦詐遂致二聖蒙塵陛下不得已應天順人續承寶緒四海生靈謳歌忭舞自西自東自南自北罔不率俾以俟庶績咸熙萬邦嘉靖陛下既即位乃宴安南京四方聞之懷疑胥動遞相鼓扇聞諸州縣間有驚劫傷殘之患蓋是小民無知因疑致憂因憂致變旋相

踐蹂弗奠攸居茲無他繇陛下寅畏過當駐蹕別都俯
徇姦謀預圖遷幸使狡獪簧惑敢爾橫肆盜據竊發罔
循跼蹐

有闕文

以歸畎畝以操耒耜鑄劒戟為農器思

不犯於有司爾若陛下勅翠華之御俾千乘萬騎回復
輦轂奠枕九重臣竊謂可以垂衣裳而天下治可以坐
視天民之阜王室自然再造大宋可以中興尚何夷狄
之足憂盜賊之足慮乎古先哲王凡有大疑必詢之左
右又詢之卿士又詢之國人又詢之卜筮臣蒙陛下矜

憐顧遇待罪開封臣夙夜思念竊恐陛下所親信左右
輔弼之臣於對揚獻納之際不思祖宗創業之艱難與
致一統之匪易輕徇臆說有誤國家大計所以狂妄冒
死觸犯天威臣不勝憂憤戰慄激切之至

乞回鑒疏

建炎元年九月通前後
表疏係第五次奏請

臣恭惟我大宋深仁厚德滂漉方夏幾二百年一旦金
人邀迎二聖京師士民皇皇無依嗷嗷無告若窮民無
所歸者若嬰兒而失其慈母者忽聞陛下龍潛在濟於

是謳歌竭蹶交走道路茲乃祖宗湛德浹洽得其心故也陛下紹登寶阼尚留南都臣自到京師聞道路籍籍咸曰陛下何不認我宗廟乎何不眷顧我朝廷乎何故使我社稷無所依乎何輕捨我生靈使我未有所仰乎是都人之望陛下也切切如此臣願早回六龍俾人感翠華之至深慰其心臣前劄具奏以謂得其民當得其心其所欲與之聚之所惡弗施爾也若陛下回鑾汴邑是人心所欲也願陛下與之聚之陛下聽姦邪畏避敵

人之言妄議遷幸是所惡也願陛下勿施爾也老臣血誠言不盡意

乞回鑒疏

建炎元年九月通前後表疏係第六次奏請

臣學問膚淺不能式是古訓對揚天休今再瀝悃誠干冒睿聽以臣耳目所親聞見事一二疏進伏望陛下哀憐特賜俞允伏覩國家嘗變更三舍之法以取士意謂臯夔稷契皆自此塗出卒之迫於月試剽竊時文罔有稽古者是三舍果不足以取士也又嘗尊崇道教以奉

真亦謂神僊莊老皆自此塗出卒之誕謾譎怪汙染成風罔有成就者是道術果不足以奉真也又嘗進貢花石以昭享上卒之驕淫矜誇蠹耗財計無有紀極是貢花石果不足以享上也又嘗結好敵人欲以息民卒之邀迎二聖劫掠侵欺靡所不至是守和議果不足以息民也當時行之固有阿意順旨作為歌頌以叨富貴者其間亦有毅然獨立不相詭隨以鯁亮獲罪者陛下觀之昔富貴者為是乎被罪者為非乎臣每思之宗廟社

稷及棄如是者盡繇姦邪儉人鼓唱四事俾民病敝幾
不聊生所以致有今日之患詩曰商鑒不遠在夏后之
世茲覆轍正陛下蕭牆之鑒今之言遷幸者猶前日之
言四事為可行阿諛諂佞動為身謀翕翕訛訛更相助
成今之言不可遷幸者猶前日之言四事不可行而罹
其罪者也且我京師是祖宗二百年積累之基業是天
下大一統之本根陛下奈何聽先入之言輕棄之欲以
遺海陬一狂類乎臣觀河東河西河北京東京西之民

咸懷寃負痛感慨激切想其慷慨之氣直欲吞此敵人
陛下何忍怙聽諛順而不令剛正之士率厲同心剿絕
兇殘乎今東京市井如舊上下安帖但嗷嗷之人思望
翠華之歸謁款宗廟垂衣九重不啻饑渴之望飲食大
旱之望雲霓也臣竊謂陛下歸則王室再造矣中興
之業復成矣陛下如以臣為狂率誕妄願延左右之將
士試一詢之昔周勃入北軍使左袒右袒以卜劉呂蓋
非獲已也臣區區誠意願陛下以遷幸大計不獨謀之

一二大臣當與億萬之衆同之臣忠憤不勝涕泣交下
激切屏營之至

乞回鑾疏

建炎元年九月通前後
表疏係第七次奏請

伏覩朝廷前遣翁彥國營繕金陵比有詔復欲遣官奉
迎太后六宮以往且謂朕當獨留中原臣伏讀詔書私
竊疑之此必有進言者勸陛下過江避寇而不思天下
大計託為愛君之迹以濟其不忠臣願陛下察其利害
之實斷自淵衷早賜定論重念本朝提封萬里京師號

為腹心以祖宗都此垂二百年宗廟社稷所在而民人
依之以居者無慮萬萬計今兩河雖未救寧猶一手臂
之不伸也而乃遽欲去而之他非唯不能療一手臂之
不伸并與腹心而弃之豈祖宗所以付託之意與天下
睽睽萬目所以仰望之心哉彼進言之臣談何容易且
利害之端曉然可見臣乞陛下且駐蹕南都未可輕議
舉動臣雖老矣尚當矍鑠鼓勇立辦禦敵之具以圖萬
全之舉然後掃除宮禁嚴備扈從奉迎鑾輿謁見九廟

非特使神祇祖考安樂之庶幾中原有仗不失天下之大勢也不然則是徒為走計爾示敵以弱非唯不恤兩河抑又不恤中原且去宗廟社稷而不顧陛下豈忍乎臣重為陛下惜者此爾故敢直輸血誠幸陛下留意無忽昔景德間契丹寇澶淵警報一聞中外震恐是時王欽若江南人即勸章聖幸金陵陳堯佐蜀人即勸幸成都惟寇準毅然闢之請帝親征卒用成功顧臣庸謬何敢望準然事適相類不敢不以章帝望陛下也臣又自

期既以迎奉鑾輿還都臣當身率諸道之兵直趨兩河之外蹠血北廷非特生縛其帥直迎二聖以歸庶雪靖康一再之恥然後奉觴玉殿以為聖天子億萬斯年之賀臣之志願始畢矣竊自謂愛陛下者無踰老臣然不知臣者必指臣以為狂妄臣亦非所恤也伏望陛下觀事之宜察臣之心則知臣之忠於為國

乞回鑾疏

建炎元年十月通前後表疏係第八次奏請

臣契勘京城四壁濠河樓櫓與守禦器具其當職官吏

協心併力夙夜自公率厲不懈增築開濬起造輯理皆就緒浸臣又製造決勝戰車一千二百兩每兩用五十有五人一卒使車八人推車二人扶輪六人執牌輔車二十人執長鎗隨牌輔車十有八人執神臂弓弩隨鎗射遠小使臣兩員專幹辦閱習車事每十乘差大使臣一員總領為一隊見今四壁統制官日逐教閱坐作進退左右回旋曲折之陣委可以應用又沿河十六縣與上下州軍相接作聯珠寨以嚴備禦又見使王彥曹中

正在河西攻擊收復州縣西京河陽鄭滑等州同為一體把截探伺次第仇方畏讐已不敢輕動冒犯自速殄滅臣自到京奉揚陛下仁風布宣陛下德意今街巷市井人情物態皆已忻悅救寧嘉靖同祖宗太平時顧臣犬馬之齒六十有九此緣陛下委付之重常患才力不任惕惕憂懼近日頓覺衰瘁萬一溘先朝露辜負陛下眷恤憐憫之意臣死目不瞑若使臣與官吏士民望翠華回輦之塵瞻仰天顏俯伏百拜然後臣退填溝壑如

生之年死骨不朽論語曰為政以德譬如北辰居其所而衆星拱之京師乃我祖宗基命肇造二百年大一統基業本根之地陛下奈何偏聽如張邦昌輩邪佞之語以巡幸為名輕去其所使四海來享來王之人徜徉道路於偏僻州軍為朝宗之地乎臣果得以此老身俯伏道左迎陛下千乘萬騎垂拱九重奉陛下指揮號令強敵可以消滅寇盜自然平蕩王室於焉再造大宋中興可必若誕妄之人言臣欲以海陬餘孽貽君父憂即臣

自頂至踵甘俟斧鉞臣已修整御街御廊護道杈子平
整南薰門一帶御路聞萬邦百姓寓于京師者日夜顙
顙望陛下迎奉祖宗之主與隆祐太后皇后妃嬪皇子
天眷歸安大內以福天下臣夙夜憂思眷眷戀戀繼之
以泣願陛下憐臣孤忠矜臣衰暮惟恐心力不逮或有
誤陛下國家大計今年河流不冰惟陛下斷自淵衷無
惑辟邪之議書曰惟克果斷乃罔後艱臣下情不勝激
切之至

乞回鑾疏

建炎元年十月通前後表疏係第十一次奏請

臣聞易於渙之卦曰渙汗其大號此言人君發號施令如汗焉一出而不可反也臣竊觀陛下踐膺大寶權時之宜駐蹕近甸天下之民延頸企踵日望鑾輿之歸經理中原以建中興之業故廼者親降詔書即將還闕恭謁宗廟延見父老中外聞之莫不鼓舞相慶以謂陛下英斷如此何事不立何功不就何浮言之可惑何外敵之足憂太平基業正在此舉下詔之後日復一日尚未

聞千乘萬騎涓日啟行民心不能無疑焉臣愚竊意陛下乾剛不撓離明並照洞見安危之幾必不肯失信於天下是必有姦臣誤陛下負失信之謗也伏見邇者河陽水漲斷絕河梁有姓馬人妻王氏者率衆討敵敵勢窮窘不知所為此天亡敵寇之時也夫天與不取反受其咎臣欲因此時遣問勅王彥各統大兵乘其危孤大振軍聲盡平敵壘伏願陛下亟還京闕以繫天下之心則孰不用命且投機之會間不容穗願陛下毋惑於姦

臣之言斷自淵衷臣自謂茲舉可保萬全無可疑者也
或姦謀蔽欺天聽未即還闕伏願陛下從臣措畫勿使
姦臣沮抑以誤社稷大計陳師鞠旅與之決戰掃盡邊
塵葺清海宇然後奉迎鑾輿歸還京闕以快天下之心
以塞姦臣之口臣蒙陛下知遇誓效死節區區愚忠不
能自已伏望聖慈特賜睿斷天下幸甚

乞回鑾疏

建炎二年正月通前後
奏疏係第十二次奏請

臣聞易曰天下之動貞夫一孟子曰天下烏乎定曰定

於一恭惟京師是我太祖皇帝肇造大一統之本根也
奕世聖人繼繼承承於此坐視天民之阜所以自西自
東自南自北莫敢不來享莫敢不來王薄海內外莫不
率俾陛下天錫勇智入紹寶緒天下之人竭蹶稽首咸
曰一哉王心今既奄有九有實萬世無疆之休陛下奈
何不念四海生靈切切後后之意乃偏聽姦邪之言託
為時巡駐蹕淮甸不思我宗廟朝廷祠享報上垂拱視
下又不思我二聖后妃親王天屬蒙塵朝夕懷想迎取

之志又不思我諸帝諸后陵園廟貌以時祀祭所以貽
厥子孫之情臣竊謂陛下若於二月間詔勅回鑾登樓
肆赦則天下皆知一人來歸九重强者當革心遠罪弱
者當屏迹復業必無憂疑聚為盜賊諸軍將士震奮感
激願敵所愾四夷凶殘必滅心爍謀以就殄滅尚何惡
之能為乎書曰時哉弗可失臣若有毫髮誤國大計臣
有一子五孫甘被誅戮以謝天下臣竊恐州縣狃於搔
擾百姓扇搖不能耕桑果耕桑失時則衣食之源盡廢

衣食不給使諸大臣中雖有臯夔稷契伊尹周公亦不能善其後矣願陛下以祖宗二百年大一統基業為意不可憂思為計而信憑邪佞自為身謀者之語早勅回鑾則天下幸甚臣犬馬之齒已七十於禮與法皆合致其事以歸南畝臣漏盡鐘鳴猶僕僕不敢乞身以退者非貪冒也寔為二聖蒙塵北狩陛下駐蹕在外夙夜泣血惟恐因循後時使天下自此失我祖宗大一統之緒所以狂妄屢有敷奏非臣好為此激訐恭望睿慈委曲

詳察

乞回鑾疏

建炎二年三月通前後表疏係第十四次奏請

臣聞人主中天下而立定四海之民恭惟太祖皇帝肇造區夏以今京師為天下中故創業垂統欲傳之億萬世太宗真宗仁宗英宗神宗哲廟奕世聖人傳以相授皆以京師為本根之地所以高拱穆清坐視天民之阜必於天下之中也惟奠枕于京則自西自東自南自北莫敢不來享莫敢不來王矣偶緣玩習太平之久文武

恬嬉狃於驕淫矜誇忘戰守之備遂致仇方橫肆殘破
州縣圍閉京城刼迎二聖后妃親王與諸天眷蒙塵北
去僑寓沙漠此忠臣義士所以夙夜涕泣繼之以血自
陛下即位應天四海萬方歡欣鼓舞垂髫鮐背山農野
叟咸以手加額仰面謝天曰天下有真主矣萬世永賴
寔天祚明德為無疆之休矣四方貼然若遠若近並無
盜賊暨陛下偏聽姦邪與仇方為地者之語移蹕淮南
諸處兇惡強盜如蝟毛起如蜂閔聚縱火殺掠所在猖

獫罔有悛懼以謂朝廷在遠無所依歸遽至是爾臣於
二月十八日祇授降到黃榜詔勅云遂假勤王之名公
為聚寇之患如是則勤王之人皆解體矣臣竊謂自敵
人圍閉京城天下忠義之士憤懣痛切感厲爭奮故自
廣之東西湖之南北福建江淮梯山航海越數千里爭
先勤王但當時大臣無遠識見無大謀略低回曲折憑
信誕妄不能撫而用之遂致二聖北狩諸親骨肉皆為
劫持牽聯道路當時大臣不出一語使勤王大兵前往

救援凡勤王人例遭斥逐未嘗有所犒賞未嘗有所幫
助饑餓流離困厄道路弱者填滿溝壑强者盡為盜賊
此非勤王人之罪皆一時措置乖謬耳比來姦邪之臣
方爾肆橫仇方自然得勢強梁惡少無緣殄滅竊念國
家聖子神孫繼繼相承湛恩盛德滲漉人心淪浹骨髓
今河東河西不隨順北敵雖為髡頭編髮而自保山寨
者不知其幾千萬人諸處節義丈夫不顧其身而自黥
其面為爭先救駕者又不知幾萬數也今陛下以勤王

者為盜賊則保山寨與自黥面者豈不失其心耶此語一出自今而後恐不復肯為勤王者矣噫得天下有道在得其民得其民有道在得其心陛下若駐蹕淮甸俾人顓顓之望皇皇之情未有所慰此失人之心也願陛下勿阻遏之以失人心臣仰詳詔語豈陛下之意皆詞臣失職不能敷繹之過臣願陛下黜代言之臣別降罪已之詔許還闕之期以大慰元元激切之意陛下還京登樓肆赦則天下之人盡皆遷善遠罪不犯于有司豈

復更有為盜者王室再造大宋中興在此一舉願陛下
睿斷而力行之若以臣言上拂陛下之意誅之赦之惟
陛下命

乞回鑒疏

建炎二年三月通前後
表疏係第十五次奏請

臣聞范仲淹云天下之事有二黨焉一黨曰發必危言
立必危行王道正直何用曲為一黨曰遜言易入遜行
易合人生安樂何用憂為天下之治亂在二者勝負耳
大抵危言危行是欲致君於無過致民於無怨而已天

下豈有不治者乎若夫遜言遜行之徒阿諛曲折隨意
所嚮迎逢苟合君施恩於上而下弗被民懷怨於下而
上弗知如是天下豈有不亂者乎今之士大夫志氣每
下議論卑陋上者不過持祿保寵下者不過便文自營
曾不能留心惻怛為陛下思承祖宗二百年大一統基
業為可惜又不為陛下思父母兄弟與至親天眷蒙塵
沙漠翹翹徯望大兵救援之意又不曾為陛下思祖宗
西京園陵寢廟為仇方所占今年寒食節未有祭享之

地又不曾為陛下思京師是天下之本根宗廟朝廷百
司倉廩儼然如舊又不曾為陛下思河北河東京之東
西陝右淮甸百億萬生靈之衆罹塗炭劫掠殘破之苦
但朝進一言暮入一說計較泛舟冒大風險欲南幸湖
外此奸邪之謀耳臣嘗思之是一欲為仇方方便之計
二為姦邪親屬皆先已津置在南嗟乎為臣不忠不義
乃至於此孔子所謂苟患失之無所不至正謂是也臣
夙夜痛心泣血瀝竭愚忠為陛下保護京城自去年秋

冬今春又三月矣農務是時陛下不早回九重則天下靡有定止臣不勝憤懣激切再瀆天聽狂妄干冒甘俟

鼎鑊

乞回鑾疏

建炎二年三月通前後表疏係第十六次奏請

易曰幾者動之微吉之先見者也君子見幾而作不俟終日孟子曰雖有鎡基不如待時蓋天下之事見幾而為之待時而措之則事無不成苟或失焉必至汗漫委靡而不振矣方今輦轂之下民俗安靖宗廟社稷儼然

如故以致收復伊洛而北渠過河捍蔽滑臺而敵騎屢敗河東河北山寨義民數遣人至臣處乞出給榜旗引領舉踵日望官兵之至皆欲戮力協心掃蕩邊裔以幾言之則大宋中興之盛於是乎先見矣以時言之則金人滅亡之期於是乎可必矣惟在陛下見幾乘時早還華闕與忠臣義士究圖事功則萬舉萬全可以滅仇方而成中興也或者以謂自揚至汴時有小寇敵屬車之來途中不能無虞臣謂造此言者乃姦愼小人自為身

謀爾殊不知盜賊所以作者誠緣法駕久寓外郡國勢未強天下不能定于一故時有竊發之事乃若六龍來復宅中圖大則比屋歡呼人各歸業強不陵弱衆不暴寡豈復有盜賊耶此事甚易明此理甚易知然而姦邪之蔽於營私徃徃不肯開陳而力為陛下詳說者惟老臣而已臣所以再三言之者豈好辯哉恭念祖宗二百年舊都不忍為姦臣委去也恭念陛下聰明齊聖之資不忍為姦臣蔽蒙也念赤子之嗷嗷不忍為姦臣坐視

而不救也念金人之猖獗不忍為姦臣縱敵而不殺也
伏願陛下念茲在茲斷自淵衷速回鑾輿上以對祖宗
之神靈下以慰黎元之懷想外以平醜類之侮拂則天
下大定指日可期書曰勅天之命惟時惟幾望陛下留
神而早復之臣今遣僚吏呼延次外及臣之子頴詣行
闕以聞

乞回鑾并罷習水戰疏

建炎二年三月通前後表疏係第十七次奏請

臣得范瓊書叙說所統軍兵有海內招安使臣水軍奉

聖旨令於儀真駐劄教習水戰控扼上流於三月八日
已到真州臣讀此語而不知扈蹕之臣誰為陛下建此
議也且王者無外其規模約束當使守在四夷昔楚人
城郢史猶鄙之況陛下奄有九有之時可規模子子為
偏霸之事乎茲特憺人之欲虛張敵勢以為可防不意
望遷延六龍進發之期爾殊不知此聲一傳則四方驚
愕必以謂中原不守遂為江寧控扼之計如是則何以
綏定四海之聽乎蓋天子為君萬邦而元后作民父母

陛下回鑾登樓肆赦則普率之人忻忻悅而相告曰天子宅中圖大則萬邦固不率俾矣元后正位丕承則兆民浸浸於變時雍矣夫如是臣將見外裔不足滅而中興之功與天比崇若使范瓊教習水戰是聖心猶豫尚緩還期見中外播聞愈自懾怯則萬國何自而咸寧乎此臣所以拭目注望屬車之塵不忘夙夜伏願陛下明詔范瓊整束人馬不須更習水戰祇備扈駕歸御京闕毋使羣黎百姓齎咨涕泣則豈惟老臣之幸寔天下萬世

之幸

乞回鑒疏

建炎二年四月通前後表疏係第二十次奏請

臣竊見漢光武用寇恂為潁川太守因從車駕擊隗囂
潁川盜賊羣起帝顧謂恂曰潁川迫近京師當以時定
獨卿能平之恂對曰潁川惡少輕剽奚能為哉但聞陛
下有事隴蜀故乘間竊發耳若乘輿南向賊必惶怖歸
死臣願執銳前驅帝即日命恂南征盜賊悉降遂建東
漢中興之業臣竊見近日有招安到丁進者數十萬衆

願為陛下守護京城又李成願扈從還闕即渡河迎取
二聖茲三頭項人馬非潁川比也今皆披瀝肝膽同寅
協恭共濟國事臣聞得道者多助多助之至天下順之
果陛下千乘萬騎來歸九重遙追我太祖太宗奕世聖
人二百年大一統基業則天下必心悅而誠服庶績其
凝萬國咸寧矣尚何盜賊戎敵之足慮乎臣敢瀝悃誠
再冒天聽伏望裁赦

乞回鑒疏

建炎二年五月通前後表
疏係第二十一一次奏請

臣聞孟子曰雖有鎡基不如待時故君子不先時而起
不後時而縮當其可而已易曰幾者動之微吉之先見
者也故君子見幾而作不俟終日不曰如之何而已恭
惟我國家曩緣敵人侵犯郊畿殘破州縣恣為誕妄百
端邀求今天意悔禍人心助順考時與幾實陛下中興
之會也古聖人勅天之命惟時惟幾者蓋以時哉不可
失而知幾若神故也臣觀京師城壁已增固矣樓櫓已
修飾矣龍濠已開濬矣器械已足備矣寨柵已羅列矣

戰陣已閱習矣人氣已勇銳矣汴河蔡河五支河皆已
通流泛應網運陝西京東滑臺京洛北敵皆已掩殺潰
遁矣天下萬邦與畿甸生靈夙夕祈天而請者鄉南懇
禱而願者但望陛下千乘萬騎號令風伯雨師清塵洒
道翠華回輦歸御九重為四海九州作主耳且一人有
慶兆民賴之茲其幾也臣願陛下毋聽姦邪之言而忽
其時忘其幾天下幸甚果怠兩河山寨之心與沮萬民
敵愾之氣則天下危矣願陛下毋循東晉既覆之轍臣

老矣不勝至誠惻怛懇切之至願陛下哀憐之

遣少尹范世延機幕宗穎詣維揚奏請回鑾疏

建炎二年五月通前後表
疏係第二十二次奏請

臣聞孟子言術不可不慎也矢人惟恐不傷人函人惟恐傷人巫匠亦然臣因斯言始知人心所存之邪正與所作之是非若以迹槩之了然區分如辨黑白夫忠義之人動容周旋無非忠義而不忠不義之士無自入焉故其於上下愛戴保護不啻如函人惟恐其傷之也彼

不忠不義之人動容周旋亦無非不忠不義而忠義之道無自入焉故其於上下毀裂擯棄不啻如矢人惟恐其不傷之也恭惟我國家曩緣仇方肆橫殘破州縣圍閉京城劫掠邀求靡有紀極以至強迎二聖后妃親王與諸天眷蒙塵北去凡忠義之士莫不痛心疾首泣血奮厲佐佑陛下張皇六師震耀神武總領貔貅之士掃蕩沙漠迎奉二聖來歸京師俾中原生靈還定安集固或流散愛戴其上保護其下夙夜念念想如函人焉惟

恐其或傷之也其不忠不義者但知持祿保寵動為身謀謂我祖宗二百年大一統基業不足惜謂我京城宗廟朝廷府藏不足戀謂二聖后妃親王天眷不足救謂諸帝諸后山林園寢不足護謂周室中興不足紹謂晉惠覆轍不足羞謂巡狩之名為可效謂偏地之伯為可述儲金幣以為敵資樁器械以為敵用禁守禦之招募慮勇敢之敵敵也培保甲以助軍慮流移之安業也欺罔天聽凌蔑下民凡誤國之事無不為之猶矢人焉惟

恐其或不傷之也臣願陛下驗已試之迹以道槩之則人心所存之邪正與所作之是非自然區分無足疑矣臣衰老孱懦謂蒙陛下識擢俾留守京城兼開封府事臣砥礪瀝竭知無不為惟恐失措有誤國家大計然臣每所申奏若非陛下察臣斷斷孤忠憐臣悄悄見愠體天地之大德覆護曙日月之大明照臨臣與血屬當膏砧斧齏粉萬狀矣尚安能為陛下保釐尹正使京城市井里巷安居樂業熙熙皞皞如我祖宗太平之時乎臣

之至此豈止謗書盈篋而已邪臣願陛下六龍萬乘早
歸大內下慰四海生靈瀝血懇切之望臣之言此實出
悃誠痛切憤悶所以不避姦邪詆誣不避冒犯誅戮臣
願陛下降臣此言榜之朝堂俾應在朝臣僚實封章疏
指摘臣言如臣言稍涉狂妄乞正典刑明臣罪惡如臣
言果符忠義乞降詔勅明告回鑾之期庶安天下之聽
此事甚大恭俟睿慈洞察勿貳勿疑

乞回鑾疏

建炎二年五月通前後表
疏條第二十三次奏請

臣犬馬之年已七十矣陛下不以臣衰老無用付之東京留鑰臣自去年七月到任夙夜究心營繕樓櫓城壁掃除宮禁闕廷分布柵寨訓練士卒教習車陣比及終冬諸事稍稍就緒都城貼然風物如舊人人延頸跂踵日夜俟望聖駕還闕臣以故自今年正月三月兩次遣屬吏及臣之子捧表遠詣行在投進懇請車駕西上歸肆大赦於宣德門使天下曉然皆知陛下言旋舊都再造王室命令用是通達盜賊用是消弭無復有方命阻

兵之患然後用臣為陛下條畫措置造膝陳請遣一使
泛海道入高麗諭以元豐構好之舊令出兵攻仇方之
西又復遣官從間道趨河東諭折氏修其舊職以固吾
圉使三陟交攻金國令彼應敵不暇吾方大舉六月之
師一道繇滑濬一道出懷衛涉河並進北首燕路訪大
遼子孫興滅繼絕約為與國則燕薊之感恩荷德不患
不為吾用如此則仇方勢必孤弱自可縛而臣之二聖
天眷自此決有歸期兩河故地自此決可收復而況兩

河之人感祖宗二百年涵養之澤雖陷敵踰年而戴宋之心初無攜貳使吾大兵渡河而戰則東北人民必有背敵歸我前徒倒戈攻于後以北誰不願為吾死孟子曰雖有智慧不如乘勢雖有鎡基不如待時今時則易然也臣嘗以今日時勢觀之天意悔禍人心固結雖三尺童子爭欲奮臂鼓勇恨不碎仇方之首食仇方之肉又況當六月宣王北伐之時機會間不容髮陛下何憚而不亟還京師使臣獲奉咫尺之威請借筋以籌黃帝

書曰日中必熸操刀必割此言時不可失也諺曰當斷不斷反受其亂此言斷不可誣也今日之事臣願陛下以時果斷而行之毋惑讒邪之言毋沮忠鯁之論倘陛下以臣言為是願大駕即日還都使臣為陛下得盡愚計若陛下以臣言為非願陛下即日放罷老臣或重竄責臣所不辭惟明主可與忠言臣故昧死以聞

奏乞回鑾仍以六月進兵渡河疏

建炎二年五月通前後表

疏係第二十
四次奏請

臣聞詩於小雅載六月宣王北伐之事蓋夷狄以弓矢馬騎為先而當六月敵蒸之時皆難於致用故宣王乘時行師終於薄伐玁狁以建中興之功臣自留守京師夙夜匪懈經畫軍旅近據諸路探報敵勢窮促可以進兵臣欲乘此暑月遣王彥等自滑州渡河取懷衛濬相等處遣王再興等自鄭州直護西京陵寢遣馬橫等自大名取洛趙真定楊進王善丁進李貴等諸頭項各以所領兵分路並進既過河則山寨忠義之民相應者不

啻百萬契丹漢兒亦必同心殲殄金人事纔有緒臣乞
朝廷遣使聲言立契丹天祚之後講尋舊好且興滅繼
絕是王政所先以歸天下心也況使敵人駭聞自相攜
貳邪仍乞遣知幾辯博之士西使夏東使高麗喻以禍
福兩國素蒙我宋厚恩必出助兵同加掃蕩若然則二
聖有回鑾之期兩河可以安貼陛下中興之功速過周
宣之世矣臣犬馬之齒今年七十矣勉竭疲駑區區愚
忠所見如此臣願陛下早降回鑾之詔以繫天下之心

臣當躬冒矢石為諸將先若陛下聽從臣言容臣措畫則臣謂我宋中興之業必可立致若陛下不以臣言為可用則願賜骸骨放歸田里謳謠擊壤以盡殘年頻煩上瀆天聽


上乞毋割地與金人疏

臣聞天下者我太祖太宗肇造一統之天下也奕世聖人繼繼相承增光共貫之天下也陛下為天眷佑為民推戴入紹大統固當兢兢業業思傳之億萬世柰何遽

議割河之東又議割河之西又議割陝之蒲解乎此三路者太祖太宗基命定命之地也柰何輕聽姦邪附敵張皇者之言而遂自分裂乎臣竊謂淵聖皇帝有天下之大四海九州之富兆民萬姓之衆自金人再犯未嘗命一將出一師厲一兵秣一馬曰征曰戰但聞姦邪之臣朝進一言以告和暮入一說以乞盟惟辭之卑惟禮之厚惟敵言是聽惟敵求是應因循踰時終致二聖播遷后妃親王流離北去臣每念是禍正宜天下臣子弗

與仇方俱生之日也臣意陛下即位必赫然震怒旋乾
轉坤大明黜陟以賞善罰惡以進賢退不肖以再造我
王室以中興我大宋基業今四十日矣未聞有所號令
作新斯民但見刑部指揮有不得謄播赦文於河東河
西陝之蒲解茲非新人耳目也是欲蹈西晉東遷既覆
之轍耳是欲裂王者大一統之緒為偏霸耳為是說者
不忠不孝之甚也既自不忠不孝又壞天下忠義之心
褫天下忠義之氣俾河之東西陝之蒲解皆無路為忠

為義是賊其民者也臣雖驚怯當躬冒矢石為諸將先得捐軀報國恩足矣臣衰老不勝感憤激切之至



宗忠簡集卷一

欽定四庫全書

集部

宗忠簡集卷六

二至

詳校官庶吉士_臣陳若霖

侍讀_臣孫球覆勘

覆校官中書_臣田尹衡

校對官中書_臣吳俊

謄錄監生_臣董邦本

欽定四庫全書

宗忠簡集卷二

宋 宗澤 撰

表

賀康王即位表

二聖蒙塵乾坤改色萬邦俟后天日宜臨亟回謙避之
誠不慰顛昂之望人神胥慶曩夏聳傳臣

中賀

竊以大

宋之應天順人太祖之創業垂統凡奕世盈成之嗣皆
挺生睿智之姿其所以繼繼繩繩莫匪乎兢兢業業浸

久太平之習稍忘禦侮之圖顧大臣歟此燕安致強敵
抵滋猖獗信和盟之妄議墮邀劫之姦謀人咸哀痛而
籲天士欲奮張而盡敵然萬方之是賴須一人之作猷
果下恤於蒸黎允上符於穹昊恭惟皇帝陛下稟虞舜
之大孝體周文之小心既不得已而有臨宜大有為而
無倦如陽方復萬物自春似日初升九幽洞照嘉靖中
興之事業戡除外侮之兇殘俾孚於休以永至治臣蒲
然朽質偶此熙辰屬總師徒進臻河朔慶雲龍之會阻

陪鳴玉之班依日月之光第切傾葵之望臣無任

云云

聞車駕將還闕賀表

建炎元年十月通前後表疏係第九次奏請

臣今月六日承遞報車駕將還闕者恭聞明命肅詔回鑾歡騰率土之謠和浹中天之氣里閭喜悅如嬰孺之將見慈親道路光輝若翳霾而忽瞻白日人情至此天意可知

中謝

竊以列聖格言先正垂裕天難諶而聰明

自我人至衆而好惡匪殊但觀自我之是非可驗匪殊之嚮背是知人所欲者自然天亦從之所以君子不務

小同自然天下能成大順恭惟皇帝陛下以道觀政以德行仁密韜神武之機獨幹乾剛之斷整齊萬乘來歸九重宇宙澄鮮預想屢豐之慶廟堂肅穆式隆宏濟之休昊穹降福以穰穰寰海來宗而濟濟六軍有雷動雲行之勢四曩蒙風驅電掃之威赫奕重光崇高再造列辟駿奔而忭舞寰區竭蹶以欽承臣無任

云云

聞車駕議還闕賀表

建炎元年十月通前後表疏係第十次奏請

恭膺明命肅詔回鑒下蘇侯后之情仰對在天之意慙

慈佳氣增光二百年之休勉勉遠猷駿惠大一統之盛

佇觀丕應聿享咸寧

中謝

竊以太祖肇基奕世嗣服並

據本根之地宏施實德之風宅四表而率服吾君奄九
有而來崇真主曩緣辰告暫聽時巡知人久戀於睿慈
聚議獨形於英斷欲繼志而述事遂幹乾而轉坤時方
奉於詔書顧忽聞於雷震是天喜悅為人音聲想衆懽
呼應時舞蹈河伯安流而迎駕雨師洒道以清塵兒童
爭提攜於壺漿父老願平治於道路里閭皞皞田野熙

熙收兩河山寨之心鎮遠徼彝人之聽然後御端門而肆赦滌舊染以維新款宗廟而告歸儼威容而如在憂勤祖述恭儉緝熙大成有截之功永以無疆惟恤臣無任云云

乞回鑾表

建炎元年九月通前後表疏係第三次奏請

臣聞君陳之尹東郊深勅謀猷之告后宋璟之守京兆極明得失而進言皆所以啟沃君心箴規政闕矧荷聖神之知眷有懷宗社之安危敢忘斧鉞之誅仰瀆晷旒

之聽

中謝

竊以天子居九重之奧窔非務蒙塵京師為

諸夏之本根當思奠枕倘值艱虞之會未詳利害之機
或輕萬乘以逡巡致駭四方之羣聽則本根斯弱華夏
奚安遠稽唐室之浸微寔乃商鑒之可擬越自運啟炎
宋卜都大梁宅中而包三萬里之幅員創業以貽二百
年之基緒重熙累洽端拱垂衣非緣三歲之親祠曷見
六龍之遠御曩值澶淵之寇或陳楚蜀之巡賴有直臣
卒排異議星奔一鋌膽落四疊豈圖女姦蠹之擅朝繼被

仇方之猾夏二聖既以北狩中都幾至內訌所幸人無
離心市不易肆日僉真人之繼統心傾我后之來蘇果
致宗廟降靈上穹悔禍皇帝陛下天縱上聖運叶中興
載纘璇圖增光火德親屈鑾輿以冒犯霜露躬整師旅
以殄滅薤薈然行在久留於別都清蹕未回於魏闕逆
徒尚熾羣盜繼興比聞遠近之驚傳似有東南之巡幸
此誠王室安危之所繫天下治亂之所關仰祈聖慮之
深詳宜戒屬車之輕動且以中國之倚恃寔為兩河之

盛疆前自敵騎長驅列城畏遁獨懷忠憤糾進義兵力
抗賊鋒率多俘馘然久闕王師之助援已深民庶之睽
疑近者雖時遣將徂征渡河深入尚闕膚公之奏先傳
南幸之音慮增四海之疑心謂置兩河於度外因成解
體未諭聖懷倘敵人乘之而縱橫則中國將何以制禦
臣叨膺委寄代匱留司茲緣密託於雲天偶遂救寧於
畿甸遽報翠華之移幸深虞中外之難安願罄孤忠冀
回淵聽昔奉春委輅建策猶止洛陽之都張禹驛馬抗

章尚返江陵之駕矧丁聖世曷愧前修伏願陛下秉虞舜察言之明體成湯從諫之聖輟巡南服回駕汴都以安東北兵民之情以慰溥率雲霓之望則人神悅豫彞夏謐寧邊陲指日以肅清盜賊不令而衰息咸資睿斷用杜危機漚悃扣閤罔避龍鱗之觸傾都拭目佇迎天仗之還願俯徇於愚誠誓益堅於忠報

臣云云

乞回鑾表

建炎二年正月通前後表疏係第十三次奏請

臣言今月二十四日準范世延等齋降詔命車駕將欲

還闕者比遣屬僚仰輸誠款薦瀆益高之聽益懷履薄之憂睿眷矜憐特賜回鑾之詔愚忠戀慕愈增後之

誠

中謝

竊以萬乘來歸六龍扈從雨伯前驅而灑道河

神迎駕以安流不煩夾道之壺漿自有隨師之甘露人情皞皞如聽南風天意昭昭乃回西顧再幹乾坤之造重增宇宙之光赫有宋之中興奄多方而大定想瞻原廟應加肅穆之儀爰御端朝愈見鬱蔥之氣雍容對越駿惠緝熙宏收率土之歡誕作普天之宥下所欲者上

必從之恭惟皇帝陛下踐祚應天時巡淮甸備歷艱難之事盡昭勤儉之風謂京師為諸夏本根而元后作斯民父母念本根不宜搖動謂父母自合依歸茲俄奉於詔音衆但知於抃舞願陛下繼志述事整頓萬機願陛下命將出師邀迎二聖平蕩叢彞之窟保全疆場之封坐視穆清時躋仁壽臣

云云

乞回鑒表

建炎二年三月通前後表疏係第十八次奏請

臣言屢奏囊封疊干宸扆聖主未頒於明命愚臣敢避

於嚴誅謹攄悃悞之誠再瀆高明之聽願從人欲以格

天休

中謝

竊以京師是諸夏本根元后作斯民父母本

根如已深固則枝葉自爾扶疎父母若未安寧則子孫
無緣泰定茲實簡編之成理蓋非里巷之浮言始陛下
踐祚於應天萬方皆欣其有主近陛下駐蹕於淮甸百
姓因此而致疑何前日之郡縣靖共而近時之盜賊荒
擾繇勤王者弗恤與救駕者靡憐贊主上遠父與兄乃
巡南服助姦臣贖壻與子欲棄中原百為祗肆於誕謾

一事罔繇於誠實迹狀如此情意可知伏望陛下斷自淵衷早回法駕據本根而致治體父母以視民俾人自勉勉以來王天亦穰穰而降福恩霈端門之赦歡收衆宇之心俗既遠罪以歸農敵亦望風而遁跡王室自茲再造大宋繇是中興黎民時雍萬世永賴果臣有飾非之語則臣甘誤國之誅狂妄奏陳憤懣流涕臣

云云

乞回鑒表

建炎二年四月通前後表疏係第十九次奏請

臣某言易謂省方書言輯瑞是天子或時巡於下土邦

人可瞻仰於至尊然古今之事勢有殊宜觀會通而制
治況上下之人情至切思聞詔命以回鑾故老臣再瀝
於血誠願聖主早形於睿斷意狂罪大語出涕零

中謝

臣伏聞先有格言事必師古藝祖應天而受成命太宗
繼志以集大勲列聖所以繼繼繩繩諸福所以穰穰簡
簡實在京師本根之地以為寰宇朝覲之天端拱而坐
九重穆清而朝萬國陛下續承寶緒紹述丕圖當奄九
有而有為體三無而無外奈有姦臣之臆說與憑仇方

之誕辭忘周宣之中興循晉惠之往轍天下之來勤王者使去義夫之黥救駕者弗知兩河保山寨之忠民四方作草竊之賊子皆緣陛下久駐蹕於淮甸咸思慕於翠華懷抑鬱而籲天罔聞致猖狂而遷善無路果還法駕大肆鴻恩人當漂雪以歸農敵亦遁逃而屏跡遁追一統之大丕昭萬世之休茲甚易知而易行勿謂難測而難識但去阿諛柔佞之語而宏剛健中正之風必天日之照臨應祖宗之保佑一人有慶庶績其凝臣無任

云云

遺表

建炎二年七月

心期許國每輸扶廈之忠死不忘君猶積戀軒之意

鬼將離於形體精忱願達於冕旒

中謝

伏念猥以樸忠

受知淵聖擢自困躋羈窮之際付以寇敵往來之衝適

遇陛下出總元戎察臣粗著榮效坐籌密計俾臣得預

屬僚逮夫踐祚之初首錄孤危之跡寇攘未泯暫為淮

甸之巡宗廟斯存委守留司之鑰力小任重志大心勞

誓殄仇方再安王室但知懷主甘委命於鴻毛無復偷
生期裹尸於馬革夙宵以繼寢食靡寧斯民獲奠枕之
安北馬無飲河之意事為紛至黽勉惟多回視顏齡已
迫桑榆之晚景益堅素節每期松柏之後彫豈謂餘生
忽先朝露尚扶病以治事敢愛已以顧私陰陽之寇洊
深藥石之功莫效少延殘喘庶畢願言昨有招安到楊
進等約其衆多無慮百萬昔嘗為寇頗聚衆以震師今
已革心欲為國而戡難足踵道路雲集都城已涓吉而

戒塗擬成功於指日干戈未舉舟壑忽移神爽飛揚長
抱九泉之恨功名卑劣尚貽千古之羞仰憑睿眷之深
必無生死之異屬臣之子記臣之名力請回鑾亟還京
闕上念社稷之重下慰黎民之心命將出師大震雷霆
之怒救焚拯溺出民水火之中夙荷君恩敢忘尸諫顓
昂法座無繇再望於清光枯朽微生從此永辭於宸扆
臣無任 云云

謝親札令縱遣敵使表

建炎元年八月
知開封府日

懷柔遠人親灑宸翰既哀矜於外使復肆宥於愚臣仰承曠蕩之湛恩但增感涕恭俟煒煌之法駕早賜回鑾

中謝

伏念臣垂釣渭濱耦耕莘野居厲舉毛之志誓端造膝之誠斷斷無他皇皇有素偶承宣於涇水辱顧盼於潛龍依日角之照臨見天顏之咫尺恪摠情悃瀝竭論思願戡外侮之艱難力助中興之事業曩聞敵使祇齎荆楚之書因憤戎心失奉本朝之意是藉口以覘虛實欲合衆以苟侵陵實不憤於誕謾遂乞收於囹圄庶

全國體以爍姦謀豈敢涉於自專乃上貽於北顧恐懼
承旨倉惶改圖文列雲漢之昭回精神滉漾筆現奎躔
之赫奕耳目疏通旋收錯愕之覓仰認撫綏之意更聽
警蹕永保生成臣云云

除京城留守兼開封尹謝賜對衣金帶表

建炎元年

八月

猥叨眷獎併冒寵光分內府之衣而副之兼金出上廐
之馬而飾以華較曳婁知感負乘增羞伏念臣濫中儒

科汎駕仕路偶緣遭遇洊被使令縈帶為城本無善策
下車搏虎徒有壯心雖殫大馬之勞曾乏絲毫之效敢
圖異數誤逮孤忠不稱身章尤慙蕃錫此蓋伏遇皇帝
陛下法天之健躬攬萬機如日之明光被九有察臣腹
心忠義曲賜顧憐知臣蹤跡羈單每加覆露故令衰朽
亦玷恩榮臣謹當克勵駑庸勉效綿薄雖逼桑榆之景
敢渝金石之心知無不為深戒容身之計老當益壯永
懷報主之忠臣無任

云云

謝降詔獎諭表

建炎元年八月

守麟符之兩月方懼罔功下漢札於九天遽叨睿獎恩言曲逮俯已增榮

中謝

竊惟京邑衆大之居實為諸夏

本根之地封畿廣遠民物浩穰豪彊萃聚而彈壓當先姦伏紛拏而發摘匪易比在熙平之盛尚稱綏撫之難况當兵火被毒之餘繼以府治曠官之後閭閻彫敝綱紀隳頽凶殘罔畏於明刑掠奪公行於白晝仰勤憂顧誤被簡求而臣學昧知方器非任重徒抱孤忠而許國

妄期薄效以報君初抵都畿首蠲宿蠹鉏耰姦暴剪蕩
寇攘良民獲奠枕之安昏夜牢鳴杓之警悉奉行於條
詔偶坐格於謚寧陛下憐臣帥府叅籌叨塵簪履之舊
念臣神州領尹粗宣犬馬之勞特陞秘殿之隆名仍畀
留司之重寄深虞尸素仰玷倚毘茲蓋伏遇皇帝陛下
柔如神之智以臨照百官體逮下之仁以駕馭羣俊彰
德非專於爵賞念功思奉於綸言冀風勸於臣鄰俾日
新於事業致茲庸陋獲預寵褒臣敢不祇服訓詞恪司

管鑰金城雉堞嚴守禦以增崇甸服田疇咸勞來而安
輯經費務先於實粟練兵敢怠於防秋預畫事宜悉符
告戒刻宸章於琬琰式昭天府之榮觀傳寶訓於雲來
永侈老臣之知遇更殫九殞少補萬分臣無任 云云

謝中使傳宣撫諭表

建炎元年十月

星使自天玉音在耳恭被聖神之賜頓增畿甸之光臣
固衰微倏望天顏於咫尺人咸慶抃願隨獸舞以駿奔
感戴而思涕淚以血 中謝 恭惟皇帝陛下聰明睿智恭

儉憂勤稟天縱之多能亶日新之盛德整淵衷之孝悌
思沙漠之父兄天鑒昭回必助恭行之罰人心激勵盡
懷敵愾之誠因矜浩穰之都遂遣皇華之命里閭見九
天之輶從競夾道以焚香父老聞萬歲之歡呼但吞聲
而飲泣伏望陛下誕宣溫詔早勅回鑾庶寬大旱之望
雲式慰調饑之念食卑誠懇切輿論傾依臣無任云云

謝收捕開封府稱御前收買珠玉仍出榜告諭

都人表

建炎元年十月

基王化而宅域中端臨萬國躬儉實以先天下懋迪羣
黎宸翰誕頒民風丕變朝野識德意之所嚮邦家知泰
階之可期伏讀訓辭第增感涕

中謝

恭以治自近始化

繇躬行儀倡肇黼庠之嚴視聽徹要荒之表好惡所示
治忽可稽弗剪茅茨堯俗於變躬履革烏漢治勃興深
惟治化之端實以樸儉為本恭惟皇帝陛下秉德紹統
建極御圖誠意正心以齊家國復樸敦本以律士民念
國步之猶艱慨民俗之浸靡克勤克儉去泰去奢屏服

用玩好之奇聚左右圖書之富申嚴厲禁豈特却璀璨之珍昭示儉純蓋將揚絲綸之化農知重穀而力穡士知守義以遵繩革蜉蝣之僭奢成行葦之忠厚一人表正四海風傾臣猥以菲才誤膺繁使惟知樸直以報國不敢偷薄以示民仰聖訓之丁寧激孤忠而抃躍臣敢不播揚純儉之化恪遵禁令之嚴一道德以同風冀追太古修政事而攘敵行見丕平臣無任云云

謝除資政殿學士進階朝奉大夫表

建炎二年二月

秘殿叅華文階序進繇被湛恩之厚靡容瀝懇之辭荷

寵若驚撫躬增愧

中謝

竊以真皇御宇之際景德紀年

之時將優待於近臣乃肇修於新職學士有資政之號
朝廷為盛事之傳舉茲以旃名稱至重若樞廷之均逸
始獲新除非丞轄之辭榮未嘗輕授豈意衰遲之跡亦
叨超躡之恩伏念臣天賦樸忠人推愚直方帥幕宣威
之日嘗贊運籌暨帝暉繼照之辰誤蒙序爵興言遭遇
良劇兢凌俄分青社之符旋拜夷門之命就司留鑰俾

衛上都初無槃木之先容實出冕旒之獨斷忠懷子翼
不忘河內之孤功謝鄼侯豫謹闕中之守深慚么麼曷
副使令敢圖繼被於褻章濫賜比蹤於前哲顧惟宿姦
之讒箭無以中傷乃如大佞之笑刀莫能潛害爰念保
全之德每懷補報之恩敢望崇資滂加朽質循牆欲避
渙汗難回茲蓋伏遇皇帝陛下堯舜性仁湯文義洽慶
賞刑威之馭衆尤先崇德而報功聰明睿智以臨人固
不泄邇而忘遠宜收簪履用慰桑榆光華顯設之榮恐

懼褒優之過臣謹當堅持晚節愈激懦衷讀回鑒之詔
書但形鼓舞感懋官之德意誓竭靡捐臣無任

云云

謝賜對衣鞍馬表

建炎二年二月

服思不稱始貴身章馬志無疆方為駿骨況帶被無金
之飾而鞍如華較之榮仰荷寵私倍增慚惕

中謝

竊念

臣叢衣冷族駑廐下材本操耒耜以耕雲偶備驅馳而
獵道恭承褒字已驚在笥之羞景仰天飛尤激戀軒之
望既免回旋而見肘敢忘夙夜以加鞭茲蓋伏遇皇帝

陛下天道覆臨萬邦衣被乾剛運動四海駿奔灼見三
有之心廸知九德之行致臣衰朽亦被恩榮臣敢不曳
婁懷慚負乘知愧素絲可效誓堅正直之心小駟無能
願竭周旋之力臣無任 云云

謝傳宣撫諭并賜茶藥表

建炎二年三月

皇華睿使溫潤訓詞仰膺覆燾之恩曲示眷憐之意孤
忠鯁槩誓戡外侮之殘直道對揚庶贊中興之盛此誠
激厲但涕交零 中謝 竊以太祖太宗基命定命其肇造

本根之際必叅稽年世之占卜既協於休祥事乃臻於
泰定所以繼繼繩繩之治無非巍巍蕩蕩之資累聖緝
熙億年駿惠逮陛下承於丕緒偶大臣密奏於偏言
託曰時巡意圖偏伯忘宗廟朝廷之重違神明天地之
心棄大一統之規模毀二百年之基業且天下是陛下
之天下彼姦臣何恤於存亡如京師是陛下之京師想
儉佞安知夫去就但知親屬歸在江湖寧顧中原變為
荆棘臣蕭然衰憊強爾支持曾無毫髮之功徒竊乾坤

之造金符剛正同

有開文

密緘蜀市之珍寵錫建溪之異

仰叨殊眷願畢餘生但知力竭以報一人豈顧狂迷而忤三事伏望陛下奮乾剛之獨斷敷離照以旁觀特出宸衷早回法駕俾四海謳謠而來享使萬民竭蹶以嚮方用承滋至之休永貽無疆之賴臣無任

云云

宗忠簡集卷二